

吳
興
藝
文
補

吳興藝文補卷之五十目錄

孫覲

泊德清龜谿亭遇大雨

題德清縣舍松筠堂菊

題隆上人墨梅花

何鑄

龐祐甫卜居白蘋洲走筆寄感

祐甫名謙孺

龐謙孺

答何中丞伯壽

郭祥正

題東老庵

何棨

題東老橋

范浚

避盜泊舟武康遠光亭下與同行分和杜工部詩

傷秋及宿江邊閣

沈與求

見前

泛舟村落阻風不能少進而菱梢芡觜繚絳上下

篇人病之

遊玲瓏山因訪朱氏草堂

次韻曾守懷玲瓏山

讀成士穀詩卷和其書事一章

士穀名無玷

鄭維心約趙安道中大家兄次律學士及僕探梅

城山乘月泛舟而歸

維心名如幾城山在德清

何子楚爲范明倫賦九疑石石吾不及見也讀詩

可以知其嶙峋秀峙之狀吾嘗卜峯石爲小寒

林興寄不淺用其韻并及之

攝尉歸安呈江嘉

南北山探梅俱未花
維心從家圃折數枝以餉坐

客蓋半開矣會次律兄有詩輒次韻

無言頌政以詩寄行簡輒次韻

行簡名一止無言劉燕字

次韻李通直題慈相寺雪月亭

次韻學士兄見一亭

次韻學士兄述懷

次韻黃子虛所居隨緣堂

遊城山夜歸泛舟南溪

舟過荻塘

寄次律兄學士柯田山新居

山在德清

過卞山次韻朱仰止澗亭絕句

曾宏父將往雪川見內相葉公以詩別次韻

宏父名惇

湖州司錄

次律兄餉魚魚不至而詩至頗類南海使君送酒

輒成二絕一笑而已賜茗少分以報厚意

劉一止

見前

送僧遊龜溪寄聲弊廬

詩

遊長興廣福寺二首

汪藻

見前

寄何山慧老

醉別季高侍郎

吾輩州龐祐甫南遷買莊吳興寄四歌令醉中倚

韻見答

鄭樵

芹齋詩

爲郡倅林寔

方正字

次韻芹齋詩

無名氏

芹齋詩

并引

胡銓

雷州和朱彥秀才詩時欲渡海

朱彥服之子

陳與義

見前

題酒務壁

懷葉天經西庵智老因訪之

天經名懋烏程人

廣福西庵與智老天經夜坐

陸佃

贈別吳興太守中父學士

張栻

六月晦發雪川廣德兄與諸友飲餞於漁山已而
皆有詩贈別寄此言謝

遊道場山大沈國錄韻

吳儆

題騎牛圖

爲陳令舉

葛立方

見前

放生

有引

瓢飲亭

在歸安泛金溪

贈普照觀主者浩然四絕

觀在菁山

沈樞

見前

題薰風堂

在安吉

莫濟

見前

次梁安老王十朋詠秦碑韻

并敘

芮燁

見前

羅浮寶積寺

舊志混入杼山

朱熹

簡寂觀

送芮國器二首

胡仔

見前

效山谷體

苕溪漁隱

韓元吉

見前

題寶覺寺

城山

王十朋

郡守

勞農峴山乘興遊何山同行朱子飛沈虞卿霍從

周范文質

父老

送陳阜卿出守吳興

阜卿見前

上丁釋奠備數獻官書二十韻呈莫子齊教授趙

可大察推

同莫教授朱縣丞朱司理遊西園

六客堂

次韻梁尉秦碑古風

次韻程泰之醑醪

富文送鹿肉

趙彥博字富文宗室居武康

郡中久雨入境而霽

寄沈虞卿寒食上安定冢

登清風樓呈通判宋子飛

至德清懷送別諸公

崔肅之雍白湖至泉遷二親之喪歸葬詩以送之

溪口阻風寄子長富文

朝離華容莫宿孟橋小店甚陋得莫潛子蒙書以

八百料船見借遂可鼓楫而西矣

子蒙名濛君陳曾孫

池之清溪如杭之西湖某歸自三峽維舟弄水亭

南望齊山翠微在眼登譙樓望九華見一峯奇

甚呈提舉李子長知郡趙富文

富文和詩復用前韻

仲冬釋奠于學同諸公登稽古閣觀弁山望太湖

壁上題名誦范文正公吳興先生富道德詵詵

弟子皆賢才之句

十月晦日會凌季文沈德和二尚書劉汝一司諫

于六客堂

德和名介汝一名度

沈尚書和詩再用韻

凌尚書和詩復用韻

劉汝一和詩復用韻

十一月十日會于六客堂者十人宋子飛徐致

章茂卿鄧叔厚莫子登俞仲明許子濟沈虞卿

鄭壽叔

子登名澄君陳曾孫

汝一和十客詩語及貢院復用前韻

晦日會于六客堂者十二人

貢院上梁

諸公和詩再用韻并簡沈虞卿教授

郡僚展餞席上賦詩

待對仙林九日登佛閣時寄家道場山思去年遊

龍臥山遂用舊韻

林黃中少卿出守吳興芮國器司業以詩送之有

今日桐城王刺史異時遺愛在吾州句用韻寄

二公

黃中名栗

上賜講讀官建茶某以說書與焉以十餅分贈太學同舍芮太博輝有詩次韻

輝輝弟

聞得吳興

二月望日欲勞農于弁山會風雨作遂出南門因登峴山觀窪尊訪五花亭遺跡晚雪遊何山觀讀書堂薄暮而還

過東林

懷忠堂

放生池

九月一日自道場山如臨安周德載夏廷茂自黃

村乘舟來訪旣別寄以小詩

次韻錢郎中豫六客堂碧淵堂二絕

莫漕以尊羹薦杯

章季子敘授惠顧渚茶報以宣城筆戲成三絕

次韻程泰之正字雪中五絕

泰之用歐蘇穎中故事再作五絕勉強繼韻

程泰之郎中以詩三絕覓省中梅花因次其韻

富文贈桂花

陳武帝

後主

呂祖謙

祭酒芮公既歿四年門人呂某始以十詩哭之

吳興藝文補卷之五十目錄終

吳興藝文補卷之五十

烏程董斯張遐周彙編

閔元衢康侯叅輯

韓昌箕仲弓增定

泊德清龜谿亭遇大雨

孫覲

崩雲四合千嶂重
奔電一掣十里紅
土囊叱吸萬竅風
江翻石走昏相蒙
疾雷破柱鞭老龍
百賈顛沛市井空
銀河倒傾千丈洪
魚鼈欲取山爲宮
洪濤衝天怒相攻
大舸吹簸如飛蓬
醉卧掀舞一葉中
洗我雲夢芥帶胷
忽然變滅何忽忽
雷公收聲電改容
霞舒霧捲繁長虹

紺碧萬頃磨青銅溪邊結網南巷翁白髮黃馘射兩瞳
赤鯉騰出無留蹤刻舟求劍何時逢

題德清縣舍松筠堂菊

孫觀

誰脚金花玉露團抱叢寒蝶冷相看不隨桃李供春事
且伴松筠到歲寒

題隆上人墨梅花

孫觀

一枝插向釵頭見千樹開時雪裏看慙媿道人三昧手
盡將春色寄毫端

龐祐甫卜居白蘋洲走筆寄感

何鑄

君愛白蘋洲携家面碧流皇程惟百里宦跡只扁舟過
盡江淮地何如苑洛遊行宮催種柳禾黍滿神州

答何中丞伯壽

龐謙齋

三載皇輿駐武林宮前新柳漸成陰西湖風月愁難度
艮嶽峯巒夢枉尋老馬驚思歸汴路寒江吼激破胡心
白蘋洲上懷鄉久夜夜啼鵲卧未深

題東老菴

郭祥正

東老沈君真隱居山環水遶開方壺何年濯足脫塵網
坐卧七言哦菴珠有時隱几佚吾老萬事不到靈臺虛

甕開綠蟻春興活仙翁夜降青雲車自稱山人號回老
爲君猛飲留斯須政訥驅盡燭不滅清風掃地銀蟾鋪
梨花蕉葉鍾與鼎倒捲滄海吞鯨魚雙瞳湛湛剪秋碧
玉山不動喬松孤倏然躍起拂素壁灑落二韻鏘瓊琚
甕乾吟罷尚携手寥寥天籟鳴笙竽度橋攘袂忽無迹
東方漸白飛羣鳥世人尋仙不可得仙人寓此情何如
桃源歸路杳難問落花流水空躊躇後來禍福固已驗
死生往復猶坦途園菴不壞子傳業玉泉遺韻清寒俱
以回易姓字可必呂仙便是山人徒

題東老橋

何 棗

散盡黃金白酒空飄然曾此躡晴虹一闌秋氣玄洲霧
兩岸春聲赤水風鐵笛已收明月下玉經還擲亂雲中
仙家咫尺紅塵外自是人間路不通

避盜泊舟武康遠光亭下與同行分和杜工部詩
傷秋及宿江邊閣

范 浚

帶郭入煙沙通村徑路微水光浮棟宇野色動窻扉小
樹無重數前山不合圍艱危隣虎窟奔迫詭牛衣白舫
竟何適丹楓看即稀西園小茆屋知復幾時歸

泛舟村落阻風不能少進而菱梢芡觜繚舷上下

篙人病之

沈與求

艇子掠岸行水瘦不濡尾狂飈振疎蓬獵獵鳴兩耳十
篙八九褪逆勢何乃爾野芡伺吾間回梢哆利觜亦有
芰浮角一一肆輕鄙初欲事幽尋解纜出疎葦乘流覓
清淺濯纓助深喜事有大自然移頃未離咫安得望蓬
萊巨艦破潮起征帆駕長風一日三萬里

遊玲瓏山因訪朱氏草堂

沈與求

平生丘壑心餘事不掛目藜杖南山來要使富幽矚異

哉小玲瓏蟠峙蒼弁腹修藤結懸崖飛溜響空曲伏石
卧虎狀騰拏雜奔鹿呀然牙吞吐側路劣容足拂拭古
蘚紋字刻翳新綠標榜玲瓏名竒怪殆天屬捫蘿上絕
頂坦坦類平陸俯首瞰來蹤穹然在幽谷傳聞昔逋客
誅茅此營屋清魂不可招千載想遺躅我思造物巧妙
供遊人祿揮斤役山祗斲此一拳玉雲牕與霧閣一一
相亘屬豈無部曲衆猿鶴卽更僕豈無節旄貴松檜自
張繡此事久棄置蛛絲網巖麓翩翩佳公子心古韻不
俗駕言脫華簪茲焉卜幽築終日面嶺岼世故豈容觸

指點空洞姿喜氣政堪掬挾策校昔游健步念須續亦有招隱詩薄暮不可讀

次韻曾守懷玲瓏山

沈與求

泉石有膏肓料理費和緩風埃客子游夢想畧相半端如麕羊酪投匕念鄉饌懷哉小玲瓏舊賞記酣宴玉女下雲牕輕我年未冠誅茅老三間此意已懸斷少須草堂資兩足那可絆謝公愛東山自結尋幽伴詩筒忽相先紙價豈容賤流傳從使君感此歸思亂擷蘭躡危根漱石俯長礪野性等麋鹿百嗜寧食薦攬衣中夜興厠

漏疾流眄局步愧驚筋卑飛傷短翰正使屐齒折未救
斧柯爛時節脫復徂遲莫空浩歎何當脂下澤去路鬱
交貫

讀成士穀詩卷和其書事一章

沈與求

長年賦子虛徇監絕同里恬水聊自酬博此一笑喜副
墨粲我前頓使百廢起朱絃渺遺音慎勿娛俗耳論交
儻自今相從期暮齒

鄭維心約趙安道中大家兄次律學士及僕探梅
城山乘月泛舟而歸

沈與求

窮居不厭車馬絕委巷衡門常晝閉朝來剝啄誰過予
倒屣逢迎走驚蹶里中勝士真可人爲憶寒梅耿殘雪
招呼聞早探幽芳平溪徑遣扁舟截西山佳處雲塢深
松竹蕭森迷洞穴上方小閣鑲空明開窗下見千山列
斷手無人貌平遠野濶天多供一瞥冰花只作小寒枝
拄杖不辭穿巖薛野僧省事畏客狂攀援自向南枝折
疎香低入坐中來骨冷肌清伴高潔襟期況有公子賢
伯也雄豪負奇節手拈凍蘂薦深杯妙語琅琅契禪悅
人間此會不多有忍放杯空成小別歸來懷抱與誰論

一
權翻然載明月

何子楚爲范明倫賦九疑石石吾不及見也讀詩
可以知其嶙峋秀峙之狀吾疊下峯石爲小寒
林興寄不淺用其韻并及之

沈與求

我升千峯倚天碧上有修筠材可遶月明三弄面巉巖
驚起哀猿啼峭壁兒童斲石樹青瑤寒林蕭蕭吹墮樵
坐令結習落幽夢芒鞋竹杖歸路遙覺來隻影徒相守
哦子清詩筆如口眼中何必小玲瓏仿佛九疑當戶牖
神丹已失太江湄誰與安期追後塵分天隔日不可到

使我目斷蒼梧雲

攝尉歸安呈江嘉

沈與求

無地誅鋤一束茅清吟端作反離騷
奔波且復同香尉蕭散還須似馬曹
名下迹公初定價暗中索我便矜豪
文章論世寧論晚肯慕羣飛輒仰高

南北山探梅俱未花維心從家園折數枝以餉坐
客葢半開矣會次律兄有詩輒次韻

沈與求

山北山南雪意忙梅花未肯闌寒芳懸知小園爭勝

爲折疎枝分外香故國年華驚曉晚老人心事伴摧藏
更看末上傳春信倚杖空懷遲暮傷

無言頒政以詩寄行簡輒次韻

沈與求

鏘磨文律似攻駒十載相從亦數予卷白欲傾東海酒
閉門貪鈔北堂書風煙入眼山圍座鷗鷺驚心水滿渠

公頗樂新居
得谿山之勝

此樂定非公所有爲聞鼃禁席頻虛

右謂
無言

平生拘曲視驪駒妙語琅琅獨起予酒面那能伴從事

行簡爲酒官
爲五斗屈也

筆頭翻欲戲中書官曹似是驚蓮幕問訊

何如念石渠只恐浮名不論數要須人識士非虛

右謂
行簡

次韻李通直題慈相寺雪月亭

沈與求

曲檻飛甍介碧空
盡供勝覽屬禪翁
蒼藤翠木四圍外
遠水平蕪一望中
幽鳥林梢鳴不斷
亂雲天末去無窮
素娥青女今何在
歸步聊乘兩腋風

次韻學士兄見一亭

沈與求

自稱居士擬香山
隻影江湖得暫閑
大隱可能追襍穢
小亭聊欲對孱顏
持杯有月同歌舞
策杖無人共往還
聞道修篁解新籜
密遮門逕不須刪

次韻學士兄述懷

沈與求

故國風煙素已諳結茅端欲占重嵐聚蚊那肯追金谷
號虎真成賦石龕阨運經過度陽九幻生顛倒識朝三
宅年自有鷄豚約小阮新居卜道南

蔥麥推還井大春拂衣歸伴卧雲人胸中歷歷蟠三畧
肘後時時校六淳已作移文排俗士更將要術混齊民
知閑聊復求閑地歲晚功名恐逼身

六淳仙藥也
見漢武內傳

次韻黃子虛所居隨緣堂

沈與求

應羨扁舟泛五湖隨緣卜築伴樵蘇青山衮衮成嘉遯
華髮蕭蕭負壯圖松檜騫騰元自植魚龍吟嘯巧相娛

清宵背立巖前月大叫三高更疾呼

遊城山夜歸泛舟南溪

沈與求

杖藜尋勝欵禪扃歸去扁舟伴月明卧樹低摧山脚轉
跳魚撥刺鱗牙驚煙埋橋影雙霓斷風熨溪光一鏡平
聚落半空無市井在亡燈火短長更

舟過荻塘

沈與求

野航春入荻芽塘遠意相傳接渺茫落日一篙桃葉浪
薰風十里藕花香河回遽失青山面菱老難容碧草芳
村北村南歌自答懸知歲事到金穰

寄次律兄學士柯田山新居

沈與求

柯田一曲抱清灣兩角孤雲擁髻鬟
猿鶴驚心猿鶴驚心猿鶴驚心
桑麻掠眼接通關似聞小築終年就應是幽扉盡日閒
爲報添丁護鷁觜夜寒歸夢遶家山

過卞山次韻朱仰止澗亭絕句

沈與求

曲澗潺潺隱石堤玉蚪雙引戲晴漪
相思後夜添清絕
水落山空月半規

曾宏父將往雪川見內相葉公以詩別次韻

沈與求

客裏思家且罷休無聊懷抱不禁愁時魚苦筍過百六
又到一年春盡頭

次律兄餉魚魚不至而詩至頗頽南海使君送酒
輒成二絕一笑而已賜茗少分以報厚意

沈與求

憑虛公子騎鯨後烏有先生控鯉初可是凡魚亦仙去
空餘一紙腹中書

先生遠餉錦鱗鮮剝啄扣門驚阿連只有珠璣落
空教口角墮饒涎

送僧遊龜溪竒聲弊廬

劉一止

師今過龜溪山水無盡綠石壁巖竇坊泉甘宜杞菊並
山行徑微草露澤人足師訪仙人家門前有修竹

詩

劉一止

南山而蹲鵲春田多鳬茨何必泌之水可以療我飢

遊長興廣福寺二首

劉一止

洶洶碧澗通小池小雨廉纖未作泥深煙爐香高着火
何須騎馬聽朝雞

山中菰韭厭蟹胥江甲防風手自鋤一榻北窗聽雨睡

全勝白飯與青芡

寄何山慧老

汪藻

一見蟬聯話不休別來林壑又驚秋每思樹杪聞清磬
幾欲沙邊具小舟未辨眼前茅一把誰知身後橘千頭
遠公社裏栽蓮處他日還能着我不

醉別李高侍郎

汪藻

疇昔追隨翰墨場功名今日愧劉郎英姿合上凌煙閣
巧譖曾遭偃月堂雙槳又乘清夜去一樽聊發少年狂
歸來却共燈花語騎省看成滿鏡霜

喜單州龐祐甫南遷買莊吳興寄四歌今醉中倚

韻見答

汪藻

買就山莊買水莊松花采罷采蓮房沼寬菱芡收難盡
又報沿籬柿橘黃

剛值吳桑盡被羅今秋種秫酒宜多諸郎慣便江南樂
不識故鄉瓠子歌

是年河決單州大浸

二尺池鰕笠闕圓兩圍園筍肉輸鮮東南佳味爭難買
自有谿山不費錢

塵尾拋來三十秋墨莊文圃舊其裘盡將浙水爲伊水

偏取湖州作單州

芹齋詩

鄭樵

千載清風去不留何人能伴赤松遊
乞骸直到骸歸日告老須臨老盡頭
元亮田園何處有子平婚嫁幾時休
湖州別駕殷深省掛却朝冠便自由

次韻芹齋詩

方正字

鄧侯牽挽政難留六十年來亦倦遊
至竟眼高無俗韻不因人喚始回頭
江湖白馬緣應熟塵土烏靴心少休
可咲山翁癡未已欲成吏隱更何由

芹齋詩

并引

無名氏

往年從林刪定時隱爲招提之遊語某以吾於九仙
作見一卷丘壑之念未嘗一日去心比掛冠得請又
欣然相語曰吾將作屋數間老於芹下吾老矣從此
皆空閒日子所未能忘書卷一事耳吳興別乘代者
以期告而公有是語壯矣哉夾際唱酬之什皆一時
顯者余其最後也作芹齋詩

春風芹下足遲留白鳥平田憶舊遊說盡軒裳還過眼
讀殘書卷復從頭偶逢隱几何須問不到投簪便擬休

平世聲名如皦日欲將何地置巢由

雷州和朱或秀才詩時欲渡海

胡銓

何人着眼覩征驂賴有新詩作指南螺髻層層明晚照
蜃樓隱隱倚晴嵐仲連蹈海徒虛語魯叟乘桴亦謾談
爭似澹庵乘興往銀山千疊酒微酣

題酒務壁

陳與義

野鳥本不羈無奈卯與申當時彭澤令定是英雄人客
來兩繩床客去一欠伸市聲自雜香爐烟自輪茵鶯聲
時節改杏葉雨氣新佳句忽墮前追摹已難真自題窓

軒壁不雜徐庾塵

懷葉天經西庵智老因訪之

陳與義

今年二月凍初融睡起茗溪綠向東
客子光陰書卷裡
杏花消息雨聲中
西庵禪伯還多病
北柵儒先只固窮
忽憶扁舟尋二子
綸巾鶴氅試春風

廣福西庵與智老天經夜坐

陳與義

殘年不復徙他邦
長與兩禪同夜缸
坐到更深都寂寞
雪花無數落天窻

贈別吳興太守中父學士

陸佃

蓬山仙子任天真乞領南麾奏疏頻金鎖闕邊辭黻座
水晶宮裏約朱輪公庭事簡煩丞掾齋閣詩多泣鬼神
莫爲行春戀茗雪鑾坡揮筆待詞臣

六月晦發雪川廣德兄與諸友飲餞于漁山已而
皆有詩贈別寄此言謝

張 栻

平生茗雪夢邂逅此登臨青山秀而遠溪水潔且深
浮玉千古色飛鳳何年音小丘闢荒蕪修竹初成林
居然得此客領畧還披襟已歌棠棣詩更作伐木吟
兄嗟弟行役友念朋盍簪情深語更質意到酒自斟
荷風生泊

莫涼雨洗遙岑翻然放舟去別緒故難任我行日以遠
佳處長會心作詩寄余韻併以謝幽尋

遊道場山次沈國錄韻

張 栻

玻璃盆外起千鬟路入空濛紫翠間心遠最便天宇迥
眼明偏見野雲閑寒泉石水留千載清磬疎鐘度兩山
我亦湘城三徑在湖邊歸去洗塵顏

題騎牛圖

吳 儆

陳令舉賢良熙寧中言新法不便謫南康酒稅叅兩
黃犢時與劉凝之跨之遊廬山李伯時繪爲圖今藏

其家

汗血聲利場舉世循一軌霜風老巖鯨松路石齒齒牛
瘦僕夫疲累累山谷裏兩翁非病狂顧獨不取彼牛背
有佳處未可語俗子夷齊向千載凜凜有生氣試問齊
景公烏用馬千駟

放生

有引

葛立方

金光明經載流水長者子以象負水救十千魚生忉
利天可謂悲濟之極報驗之速矣厥後見於記傳有
放鱣得金放龜得印者其類甚多遂使上機生無緣

之慈下土冀有因之果皆流水長于之慈意也余居
泛金溪上暇日率同志拏小舟載魚鼈蝦蟇命五比
丘誦寶勝佛名若十二因緣法作梵唄捨之溪中坐
間有請作詩以紀一時之事者余輒爲書云

漁師竟日漁水族作斤賣小捐使鬼兄滿載獲鱗介鯢
鯨未易羅所得亦殊態青蛙盡公私朱鮪兼小大霜鱸
尚貫釣土負或粘塊輪囷積文螺郭索定蒼蟹濕沫相
响濡自分煮薑芥豈知惻隱人規作江湖貸因呼小青
翰收留舞澎湃趺坐延黑衣號佛指清瀨經飛流水篇

梵起魚山唄傾盆帶寒藻闐闐看于邁驚疑或依蒲喜
躍或生喝快若鷹辟韞歡如囚破械定非校人池恐是
餘不派願汝藉佛力永脫鈎網債口腹聊爾耳香餌莫
巨愛

瓢飲亭

葛立方

文康公築室泛金溪上闔門千指朝藜藿鹽未嘗取
以貧爲病嘗因溪結亭號曰瓢飲蓋欲少見慕賢好
古安貧樂道之意予嘗有詩云

我不學許由隱烟霧得瓢不飲惟挂樹又不學德義居

虎丘帶瓢入市多騎牛分無玉甌囊古錦病渴文園只
瓢飲下瞰金溪新結亭未須引吸如長鯨但願金溪化
爲酒歲歲持瓢醉花柳

贈普照觀王者浩然四絕

葛立方

餐霞吸瀝烱方瞳時着青裙拜木公玉女投壺天爲笑
却來綉嶺伴仙翁

丹成誰羨伯陽山白犬騰空恐浪傳未似尊師得丹訣
火毬吞吐葛山前

靈桃入手亦艱勤正一門中近策勲未說趙昇王長在

鳴鳴衣鉢已輸君

舊得陰符虎口巖素書添軸玉函緘君方濡筆書靈篆
已有飛來青鳥啣

題薰風堂

沈樞

築室最高處軒窗八面通
鑿山流乳液開戶納薰風
巾屨隨涼設茶瓜與客同
我來資解慍不羨楚王雄

次梁安老王十朋詠秦碑韻

并叙

莫濟

秦會稽石刻唐人如張守節司馬貞皆嘗援以證史
記紹興初舅氏姚令威刪定登山吊古見碑石猶存

後二十餘年分教是邦以語僉判王龜齡勉邑尉梁
君求之則石已缺字不可見矣梁君以詩記其事龜
齡旣賡之以濟首發其端書以示濟按會稽秦頌德
碑凡二百九十六字視秦世泰山之朶諸刻獨此碑
字爲最多唐李嗣真云斯小篆之精古今妙絕秦望
諸山及皇帝玉璽猶千鈞强弩萬石洪鍾豈徒後學
之宗匠是亦傳國之遺寶周越法書苑獨載封禪碑
數十字而已至歐陽公趙德父集錄天下金石遺文
殆盡亦不復有秦望山碑姚令威紀鸞鼻山頂石屋

所插一碑今石屋固在碑蓋無有梁次張所模片紙
指爲秦碑乃在何山其去鶩鼻尤爲隔絕盡記本末
以俟後之君子

六王失國四海歸秦皇東刻南巡碑法因史牘有增減
名與蒼頡爭飛馳自言功德可歌頌黔首涸涸愚無知
海神何故獨拒命風濤塞路蟠蛟螭羣臣諂佞仙藥遠
死生治亂分兩岐山靈不可守碑記片段應作龜床支
陵谷雖存世代異耳目雙被誕者欺只餘紙本落人世
千古遺臭東南崖我聞秦望最高峻城域所見非昔時

何山距縣四十里符合傳記壯且奇衆峯及是子孫行
木古幾換蛟龍枝指東作西未足怪父老流傳從小兒
政如塗山玉帛會設不可考歲久之梁君吏隱年甚少
鬱鬱寸角初解麋裘糧挈榼訪古跡氣味蕭散如分司
忽聞片石在絕頂小篆無乃斯翁爲手披荆棘訶虎兇
柱杖直印山頭皮模糊豈復有字畫此物及見秦亂離
當時威勢振天下不言慘毒民嗟咨乘輿所至爲刀鋸
方嶽何暇安禮儀關中屢棄百二險歷數浪指億萬期
君臣乃爾自賢聖鯁論不復相瑕疵陳迹安知百世後

樵夫牧子笑脫頤興亡俄頃三歎息撫掌重閱太史辭
假使玉筯餘筆畫文過其實世所嗤早知金玉不可恃
相君應悔燔書詩

按姚令威名寬剡川人濟爲湖人何以目姚舅氏濟
與龜齡倡和俱言是彼教授而紹志於職官不之及
何也問元

羅浮寶積寺

芮燁

木落天寒山氣沉年華客意共蕭森偶於佳處發深省
其實宦遊非本心紅日坐移鐘閣影白雲閒度石樓陰

莫語神仙事老不寬人雪

簡寂觀

朱熹

高士昔遺世築室蒼崖陰朝真石壇峻煉藥古井深結
交五柳翁屢賞無絃琴相携白蓮社一笑傾夙心歲晚
更朝市故山鎖雲岑柴車竟不返鸞鶴空遺音我來千
載餘舊事不可尋四顧但絕壁苦竹寒蕭參

送芮國器二首

朱熹

在節千山外勤勞飽所經一心無適莫萬口自丹青拂
拭先賢傳光輝處士星活人功最遠試與問林垌

紫陌同年舊青雲得路新論心端有契下榻豈辭頻話
別驚如許相逢渺未因期公念經濟從此上星辰

效山谷體

胡仔

青玻瓈色瑩長空爛銀盤挂屋山東晚涼徐度一襟風
天分風月都管領對之技癢誰能忍吟哦自恨詩才窘
掃寬露坐發興新浮蛆琰琰拋青春不妨舉蠶眉三人

茗溪漁隱

胡仔

溪邊短短長長柳波上來來去去船鷗鳥近人潭不畏
一雙飛下鏡中天

雲漢煙蒼蒼蓮花初白蓮葉黃釣船盡日來往處
南村北村杭稻香
捲起綸竿撒釣歸短篷斜掩宿魚磯日高春睡無人喚
撩亂楊花繞夢飛

題寶覺寺

咸山

韓元吉

澤國富煙波曠達無丘陵茲地驚見晚蒼崑正峻嶒翠
篠森野蔓喬松挂枯藤剗山出古殿暎水明青燈蠟屐
從吾侶應門走殘僧旅懷百憂煎得酒如飲冰誰能插
羽翰去作孤飛鷹徘徊候佳月晚風涼可乘雲間幾丈

塔闌檻思一凭會看雨徑乾來登最高層

勞農峴山乘興遊何山同行朱子飛沈虞卿霍從

周范文質

王十朋

去秋遊道場俯矚何山路林泉雖在眼未暇飛杖屨塵埃汨城市遙望隔煙霧春光忽已半播穀催農務欲作弁山行偶逢風伯怒肩輿出城南乘興訪幽趣山燕佛屋深跡躡陳朝故老松不記年修竹莫知數鳥鳴說法時花落禪棲處書空何公堂水拱安定墓青山蒼翠足回首日已暮小溪何處是歸誦蘇仙句

父老

王十朋

父老自何處同來送使君手中一爐香敬爲使君焚使
君無善政父老何慙慙固辭答使君去秋稼如雲淫雨
害垂成一年計徒勤使君體上意租苗放三分父子免
流離歡然事耕耘年凶米不貴夜靜犬不聞顰眉答父
老正緣此紛紛黃堂非坐處歸歟老桑粉

送陳阜卿出守吳興

自察院遷郎
未幾得外

王十朋

臺閣輟名士符竹分帝憂縉紳有清議欲爲朝端留才
名四十年骭髀成白頭方開公道口遠中讒人鈎觸邪

孤壯志飲惠施一州命義二大戒能言亦能由

阜卿嘗作命義

天下之大戒論學者至今傳誦

去矣雪水清孰障天下流願言如季路

乘桴共公浮

上丁釋奠備數獻官書二十韻呈莫子齊教授趙

可大察推

王十朋

魯人呼東家陳蔡不火食當時雖高第往往亦慍色孰知夢奠後廟祀亘無極嵬然袞冕尊王侯面俱北武成祭上戊龍棄配社稷隆殺良不同論功豈如德去載游上庠觀禮杏壇側備樂閱九奏銀袍爛千億茲焉客蓮

幕濫與俎豆職登階瞻睿容炳晬若親識壯哉芹藻宮
不減魯侯國歸賡泮水頌才劣慙史克

同莫教授朱縣丞朱司理游西園

王十朋

黎明出城郭偶作西園游春淺花未都池寒綠初抽湖
山欲縱目烟靄浮不收初來興非淺心賞殊未酬賴有
三君子清談洗牢愁更期春色濃携樽泛仙舟

六客堂

王十朋

水晶宮中刺史宅月照夜堂遊六客中有一客爲主人
萬卷詩書李公擇元素毫揮玉堂手令舉聲蜚制科策

五勸使君古遺直三影郎官老詞伯眉山有客何等人
退之少陵李太白直道高才時不容天遣數子爲遊從
吳興清絕山水國五百年過人中龍健筆銀鈎逼顏魯
點化湖山出奇語高壓白蘋洲上詩更肯區區談小杜
端如竹溪逢謫仙並遊遊士名俱傳飄飄乘風鼓長翮
兩兩照坐成台躔蒼雲交流下山碧一代名賢已陳迹
我後百年登此堂咀嚙姓名牙頰香坐上何曾欠佳客
蘇仙一去難再得

次韻梁尉秦碑古風

王十朋

會稽秦頌德碑丞相李斯篆世傳在秦望山莫知所
在教授莫君好奇嗜古搜訪尤力有言碑在何山者
莫以語某何山見于圖經在秦望東南疑其真秦望
也某欣然欲往職所有拘以告會稽尉梁君梁慨然
而行登山果見之碑石僅存字磨滅已盡墨片紙而
還作古風長韻具記始末因次其韻且記吾三人好
事之癖亦以示後人也

姬嬴遺跡存者希世傳石鼓稽山碑石鼓揄揚得韓子
文與二雅爭驅馳秦碑夸大頌功德埋沒草莽無人知

或言山頂石猶在上有虎豹龍蛇螭神藏鬼護荆棘蔽
崖懸磴絕登無岐廣文好奇穴探出梅仙喜事僧尋支
我贊其行要親覩勿受世俗流傳欺望秦秦望兩嶄絕
何山壁立東南涯豐碑屹柱最高處不知磨滅從何時
剔苔掃墨了無有模糊片紙亦足奇濃雲霽霽黯將雨
古木槎牙蟠老枝歸來走筆出險語訶政叱斯同小兒
詩成得得寫寄我辭嚴意偉法退之我聞秦人滅六國
酷若犬獬臨江麋先王法爲秦所負負秦况有秦有司
玉經灰飛儒濺血堯舜周孔何能爲上蔡獵師妙小篆

奴視俗體徒肥皮東封太山南入越大書深刻光陸離
沙丘風腥人事變鬼飢族赤誰嗟咨漢興萬事一掃去
惟有篆刻餘刑儀磨崖欲作不朽計其如曆數不及期
蚩尤五兵紂漆器人物美惡寧相疵我雖過秦愛遺畫
南山入望頻支頤不須嶧陽訪棗刻不用遷史覲雄辭
虛堂默坐對此紙閉眼暗想君勿嗤要知秦碑沒字本
却類周雅無辭詩

次韻程泰之醢醢

王十朋

青春果作堂堂去啼鳥喚春春不住明珠萬顆玉爲錢

欲貫風光嗟已暮蓬山地冷花木稀
祗有寒梅已先雨
誰遣虬枝上高架稍覺雲陰覆
行路雨餘景物猶未佳
葉底精神不多露鼻觀疑聞班馬香
姿比何郎更風度
平生惜春如惜別老眼待花如待哺
幽亭相對止三人
草草杯盤爲花具

時同舍考試滄泰之員仲某在館

富文送鹿肉

王十朋

大尉前軍得活鹿

全用米簡上字

使君慇懃分我肉定知應是

秦失餘苗裔仍爲世人逐使君好客今平原秋浦樓頭
羅水陸青州從事嘉麋拜白鹿山人賜新沐社風留客

去未得清溪山頭兩經宿頻將口腹溷使君大嚼戲吟
詩一幅

郡中久雨入境而霽

王十朋

積雨喜初霽湖山清更嘉船船漁晒網岸岸稻烘芽水
漲魚蝦樂年凶道路嗟人言新太守頭白似蓓花

寄沈虞卿寒食上安定冢

王十朋

先生宋儒宗風義起人聳何山如孔林世俗豈知重廣
文領諸生寒食親上冢我獨不得行爲義慙無勇

登清風樓呈通判宋子飛

王十朋

茗雪水會處樓高風快哉洲中白蘋動天半故人來穆

入周臣頌雄勝楚客臺飄飄玉川子乘興上蓬萊

時某得祠

子飛攝郡事酌別是樓子飛亦將美解故末章及之

至德清懷送別諸公

王十朋

舟泝餘不

平聲

水回頭憶兩溪川長太湖隔天遠下峯迷

左顧龜何在

縣有左顧亭孔愉放龜處

南飛鳥欲棲從今到家夢却

到淞江西

崔肅之

雍

自湖至泉遷二親之喪歸葬詩以送之

王十朋

番水同僚舊遙從雪水來異鄉欣覩面清話洗衒哀
葱鬱佳城就勤勞孝子回不應淹權酷中外正須才

溪口阻風寄子長富文

王十朋

風知主人意吹浪留客舟客子念行役形留心不留回
望月峽月坐悲秋浦秋從今懷人夢飛遶清溪樓

朝離華容莫宿孟橋小店甚陋得莫漕子蒙書以
八百料舡恩信遂可鼓楫而西矣 王十朋

曉發華容寺雲開鄂渚天秋深餘晚稻地曠闢官田草
市魚多骨荒村店有烟計臺書報我已具濟川舡

池之清溪如杭之西湖某歸自三峽維舟弄水亭
南望齊山翠微在眼登譙樓望九華見一峯奇
甚呈提舉李子長知郡趙富文 王十朋
城南風物似西湖萬里歸舟入畫圖光潔貯懷便弄水
翠微照眼稱提壺浦無時節秋尤好池有精神貴可呼
最是九華知客意倚天遙露一峯孤

富文和詩復用前韻

王十朋

四上祠章郡得湖真同起廢甃浮圖路經秋浦人如玉
洞入齊山天在壺人物宜居國士選吏民聊作使君呼

還鄉說與賈君子官比廣昌風更孤

賈君元範永嘉賢者與富文同官廣

昌每稱

其為人

仲冬釋奠于學同諸公登稽古閣觀弁山望太湖

壁上題名誦范文正公吳興先生富道德詵詵

弟子皆賢才之句

王十朋

吳興學校規模壯安定先生道德崇名震溪同洙泗水
汀洲蘋有藻芹風山知尊道猶端弁湖欲依光故近宮
壁上題名觀尚友諸儒事業聖賢中

十月晦日會凌季文沈德和二尚書劉汝一司諫

于六客堂

王十朋

夢寐思賢願與齊一麾來字湘江西星躔舊識尚書履

凌爲吏侍時
某爲司封郎

玉府曾親太一藜

劉爲校書郎
某忝同舍

天遣門生

依坐主

某補戴公試解
試皆沈王文

心隨峽水注茗溪邦人異日談

遺事名姓應同六客題

沈尚書和詩再用韻

王十朋

先生名與卞山齊賤子來歸自瀼西自媿蒹葭難倚玉
暫教松柏俯同藜萬言讜論驚天闕八詠高才壓婺溪
柳惲蘓仙舊吟處願陪杖屨徧留題

凌尚書和詩復用韻

王十朋

人物堂堂大國齊難窺賜履地東西
心才遇日卽傾藿
身或在山誰采藜
隱德猶能及枯骨
尚書嘗率衆葬枯骨
安車行
見起蟠溪後生何幸依先達
誤辱山公二字題

劉汝一和詩復用韻

王十朋

魯酒三杯却到齊
詩壇老將勝山西
氣餘殿上欲折檻
清見胸中不糝藜
聊復亡機對禪榻
未應采藥赴桃溪
吾儕會合真天意
清絕湖山盡共題

十一月十日會于六客堂者十八
宋子飛徐致雲

章茂卿鄧叔厚莫子登俞仲明許子齊沈虞卿

鄭壽叔

王十朋

六客高風不可追吾儕生恨百年遲星光月滿舊遊處

簪盞冀開盈數時訪古已仙圖上鶴得朋今遇易中龜

吾夫子道欲墜地不是四科誰與持

某方欲建夫子廟
延貢院願諸公表

率故末
章及之

汝一和十客詩語及貢院復用前韻 三十朋

洙泗家風尚可追未應吾道便陵遲要令士有歡顏地

如見公爲舉首時

汝一發薦
于貢院

山遶蒼溪蔽振鷺水通震

澤錫神龜眼中突兀行將見大厦還須衆木持

晦日會于六客堂者十二人

王十朋

湖山清絕多佳士暇日壺觴得共携堂上合成前後客
詩中分得建除題不容閨位叅卿月坐覺巫山在雲溪
麟閣功名屬公輩老夫惟願把鋤犁

貢院上梁

王十朋

清絕湖山映白蘋聲飛梁棟眼中新雪花先作曉來瑞
桂魄正圓天上輪夫子廟還元氣象水晶宮發舊精神
書生戰藝真餘事移孝爲忠要致身

諸公和詩再用韻并簡沈虞卿教授 王十朋

來采汀洲柳憚蘋要觀草色賜袍新士由德行首科第
不就方圓在梓輪山峙浮圖聳千笏水迎仙子上三神
耽耽廣厦榮歸日應話林泉老病身

郡僚展餞席上賦詩

王十朋

五年三郡厭驅馳聖上隆恩許奉祠孤嶼衆山重對酒

清風明月欠吟詩

清風明月二樓名某至郡困於吏事賦詩無幾

心勞撫字政

尤拙田不荒蕪去亦宜餞別同僚三十二雲臺功業滿

相期

待對仙林九日登佛閣時寄家道場山思去年游

卧龍山遂用舊韻

王十朋

浮家東下路間關地近家鄉尚未還風雨滿城欣已遇
星霜入鬢早宜開去年嘉客同吹帽今日仙林獨侍班
徧插茱萸憶兄弟更添北望道場山

林黃中少卿出守吳興荷國器司業以詩送之有

今日桐城王刺史異時遺愛在吾州句用韻寄

二公

王十朋

出處平時正且嚴猶於瓜李謹疑嫌兩溪水照新明月

郡有明
月樓

六客堂逢舊紫髯

孫莘老美須髯嘗守吳興黃中亦美髯故云

安定

化應孚學校謝公思已結間間湖山清遠使君好想見
邦人慰所瞻

賢關今日陽司業家在白蘋溪上州筆下波瀾含震澤
胷中意氣屬清流弁山疊拜南金贈泉嶺遠蒙明月投
老矣惟公獨青眼一言褒借勝封侯

上賜講讀官建茶某以說書與焉以十餅分贈太

學同舍芮太博輝有詩次韻

王十朋

天表初容咫尺親雲龍重拜六官珍賜從明主恩尤泥

分及清流事更新搜卷要須嘗七椀乘風便合到三神
諸公異日沾君貺願寄江湖老散人

聞得吳興

王十朋

暮年身似杜陵翁流落烏蠻白帝中聖王哀憐不終棄
乞祠却得水晶宮

二月望日欲勞農于弁山會風雨作遂出南門因
登峴山觀窪尊訪五花亭遺跡晚霽遊何山觀
讀書堂薄暮而還

王十朋

弁山龍欲阻吾行怪雨盲風不肯晴但得出郊修故事

此中亦可勸深耕

天遣吾來此勞農要令遺躅訪顏公雖無二十四賓客
詩酒略追前輩風

久欲歸耕竟未歸又吟荅雪勸農詩流錢腐粟慚無術
稼穡艱難或少知

過東林

王十朋

地入東林眼界奇神仙遺跡在榴皮湖山如舊無東老
酒爲嘉賓釀者誰

懷忠堂

王十朋

霜嚴日烈與時乖前後姦邪屢見排
茗雪祠堂境清絕孤忠千古有人懷

放生池

王十朋

畏死貪生物我同仁心要在擴而充
江湖魚鼈知多少盡在恩波浩渺中

九月一日自道場山如臨安周德載夏廷茂自菁
村乘舟來訪既別寄以小詩

王十朋

二十年來舊友生扁州來訪見交情
相看容鬢俱非昔記得爐亭笑語聲

次韻錢郎中豫六客堂碧澗堂二絕 王十朋

六客高風久已無
花間誰對謫仙壺
星躔一夕光芒動
知有仙舟入畫圖

一樽相對眼俱明
細話同僚舊日情
漢世郎官亦華髮
恨無詩句似君清

莫潛以尊羹薦杯

王十朋

蕭瑟秋風送鴈回
夢魂終夜遶篇臺
年家知我鄉心切
斫鱸羹薦薦酒杯

章季子教授惠顧渚茶報以宣城筆戲成三絕

王十朋

春回顧渚雪芽生香味尤宜泌水烹搜我枯腸欠書卷
飲君清德賴詩情

白齒新芽不出山青囊誰遣到人間午窗驚覺還鄉夢
紗帽籠頭捧兔班

季子以青囊紗盛二兩云乃真
傾渚零陵似不出山絕品也

書水書來寄葉嘉中山人去代瓊華定將絳帳續人手
散出毫端千種花

次韻程泰之正字雪中五絕

王十朋

幻玉蜚花濕帝城蓬萊燈火冷中清人間草木舊相識

頃刻還驚面目生

栖鳥驚起天無月化鶴歸來頂不朱錯認湖山作西子
眩人疑是玉肌膚

點綴工夫巧更奇崑崙玉果半藏蕤嗅梅咀雪欲腸斷

况讀高生人日詩

人日雪

預知禾麥定登場六出攙先瑞衆芳更喜江梅自瀟灑
不緣摧壓減清香

卧聞征鴈作回音遙想吾廬玉滿林乘興扁舟定歸去
草堂深處伴猿吟

泰之用歐蘇穎中故事再作五絕勉強繼韻

王十朋

君詩雅勝五言城白雪篇章分外清
不許同僚持寸鉄筆尖戰退老書生

寒侵睡思那成夢酒著衰顏誤抹朱
待詔先生應怯冷餐毡使者可稱膚

穀精蜚處人爲日冰鑑頒時律應藎
照耀元宵更盈尺不容燈火占新詩

煮海神功不計場逼真冷焰奪春芳
東君深恐成堆積

急遣雷公喚阿香

夜靜微聞折竹音驚禽何處更投林
寒生習氣無繇掃
遙對湖山忍凍吟

程泰之郎中以詩三絕覓省中梅花因次其韻

王十朋

長記蓬山舊賞梅芳樽一笑共君開
重遊未見梅花面
應誤君詩得得來

詩似西湖處士詩十篇三絕闔清奇
更將正味森嚴句
壓倒屋簷斜入枝

竹亭不到幾經時來往逢梅似退之遙想吾廬溪上好
十分鄉思又開眉程末篇云花中結子酸連骨正味森嚴衆苦之待得和羹渠自會如今其
眉
官鐵人

富文贈桂花

王十朋

夔有百花無此香兩年官舍負清光使君元是蟾宮客
贈我數枝金粟黃

陳武帝

王十朋

一旦權臣外召君已知天帝欲興陳江淮若道無神物
誰報齊兵至壽春

後主

王十朋

臨春閣上醉流霞
狎客酣歌興未涯
江左半無陳日月
君臣猶聽後庭花

祭酒芮公既歿四年門人呂某始以十詩哭之

呂祖謙

少年把筆便班揚
咳唾珠璣落四方
歲晚寒窗渾忘却
瓦爐香細雨聲長

際野塵埃撲面來
萬人蟻聚撥難開
手中朽柄長多少

蟄盡飢腸十月雷

公爲仁和尉歲荒辟有溝野區虞賑恤有條理

小醉初醒日半昏
森森赤棒遶離門
慨然投袂無難色
不識從來獄吏尊

公嘗爲某道坐
詩獄時如此

交廣歸來里巷迎
破囊又比去時輕
何須更酌廉泉水
夫子胸中萬斛清

殿前拜疏閱羣公
獻替從違各異同
陛楯諸郎自相語
白頭祭酒最由衷

出祖津頭六館空
帽簷齊側掛帆風
吳興盛事人能數
直自胡公到芮公

聞人有善已伸眉
倒廩傾囷更不疑
羣羣萋萋竟何許

卷阿空老鳳凰枝

曾懷北海與南溟却要涓涓一勺清相對楚然如重客
無人信道是門生

璧水經年奉宴居天和襲物自舒徐憑誰寄謝朱公掾

纔向春風坐月餘

朱公掾見明道于汝州歸語人曰光庭在春風中坐一月

先生墓木綠成圍弟子摧頽盡掩扉大雪繁霜心已死
有時清夢尚握衣

吳興藝文補卷之五十終